

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 259594 25 St
Zenica, 29.09.2025. godine

Općinski sud u Zenici, stečajna sutkinja Sanja Pavlić, u stečajnom postupku nad društvom DRUŠTVO ZA PROIZVODNJU, TRGOVINU I USLUGE "ELVITEX" D.O.O. ZENICA, ul. Zmaja od Bosne b.b., koga zastupa punomoćnik Advokatsko društvo "Alemdar Brkić" d.o.o. Tešanj, ul. 1.marta br.1., Tešanj, na ročištu 25.09.2025. godine donio je sljedeće:

R J E Š E N J E

Pozivaju se povjeritelji i zainteresirane osobe da u roku od 30 dana od dana objavljivanja poziva na oglasnoj tabli suda, web stranici suda-elektronskoj tabli suda, Službenim novinama F BiH, predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM na depozitni račun suda, broj: 134-010-0000044837 otvoren kod ASA Banke d.d. Srajevo, Poslovnica Zenica.

Ako povjeritelji ne predujme iznos naveden u stavu jedan ovog rješenja u određenom roku u ovom rješenju, upozoravaju se da će stečajni sudac otvoriti stečajni postupak i odmah zaključiti postupak nad društvom

Ako povjeritelji predlože otvaranje stečajnog postupka i uplati predujam u navedenom roku stečajni sudac će otvoriti stečajni postupak i voditi ga u skladu sa odredbama Zakona o stečaju.

O b r a z l o ž e n j e

Predlagatelj DRUŠTVO ZA PROIZVODNJU, TRGOVINU I USLUGE "ELVITEX" D.O.O. ZENICA, ul. Zmaja od Bosne b.b., Zenica, koga zastupa punomoćnik Advokatsko društvo "Alemdar Brkić" d.o.o. Tešanj, ul. 1.marta br.1., Tešanj, podnio je prijedlog za otvaranje stečajnog postupka nad društvom DRUŠTVO ZA PROIZVODNJU, TRGOVINU I USLUGE "ELVITEX" D.O.O. ZENICA, ul. Zmaja od Bosne b.b., Zenica. Sud je 18.06.2025. godine donio Rješenje o pokretanju prethodnog stečajnog postupka i za privremenog stečajnog upravitelja imenovao Vehab Harisa sa liste stečajnih upravitelja.

Na ročištu za utvrđivanje uvjeta za otvaranje stečajnog postupka 25.09.2025. godine privremeni stečajni upravitelj je izjavio da je izvršio obilazak mjesta koje je u sudskom registru označeno kao sjedište firme-ul. Zmaja od Bosne bb, Zenica, kojom prilikom je utvrdio da na poslovnim prostorijama i prostoru ispred poslovnih prostorija nema natpisa koji bi upućivali na to da je na toj adresi sjedište firme i da stečajni dužnik tu obavlja poslovne djelatnosti, a da je iz razgovora sa direktorom društva i na osnovu dokumentacije koja mu je bila na raspolaganju utvrdio da je društvo osnovano 2007.godine, da je pretežna dodijeljena djelatnost društva bila proizvodnja radne odjeće, da je poslovanje društva u potpunosti obustavljeno, da posljednje poslovne aktivnosti društvo je ostvarilo u 2009. godini, da društvo ima dva transakcijska računa koji su blokirani radi nemogućnosti društva da izvršava svoje dospjele novčane obaveze, da društvo ima dug po osnovu javnih prihoda, da društvo ima dug i prema drugim povjeriocima, da direktor društva nije u radnom odnosu, da društvo nema ni jednog zaposlenog radnika, da je posljednji finansijski izvještaj sačinjen za potrebe pokretanja stečajnog postupka, a odnosi se na period od 01.01.2025.godine do 18.03.2025.godine, da za raniji period nema dostupnih finansijskih izvještaja, da društvo nema vlastito knjigovodstvo, a nema ni zaključen ugovor sa knjigovodstvenom agencijom za obavljanje računovodstvenih poslova te da osim poslovne dokumentacije koja je dostavljena sudu uz prijedlog za otvaranje stečajnog postupka, društvo djelimično posjeduje poslovnu dokumentaciju o poslovanju firme u proteklom periodu te dokumentaciju o osnivanju firme. Izjavio je da analizom bilansa uspjeha za period od 01.01.2025.godine do 18.03.2025.godine utvrđeno je da u navedenom periodu društvo nije ostvarilo nikakve poslovne prihode, da u navedenom periodu društvo nije imalo ni rashoda, da je za isti period dobit društva iznosila 0,00 KM, te da za isti period gubitak društva iznosi 0,00KM. Izjavio je da ukupan kapital društva iznosi -114.795,00 KM, vlasnički kapital iznosi 2.000,00 KM, a akumulirani nepokriveni gubitak iz ranijeg perioda iznosi 116.795,00 KM, što znači da je društvo ostvarilo gubitak iznad visine kapitala u iznosu od 114.795,00 KM. Izjavio je da je prema Bilansu stanja na dan 18.03.2025.godine iskazana ukupna pasiva ili obaveze društva u iznosu od 114.795,00 KM, a sastoje se od kratkoročnih obaveza u iznosu od 114.795,00 KM, koje se odnose na finansijske obaveze po

amortizovanom trošku u iznosu od 15.562,00 KM i ostale obaveze uključujući i razgraničenja u iznosu od 99.233,00 KM, da finansijske obaveze po amortizovanom trošku se sastoje od obaveza prema dobavljačima u iznosu od 13.653,00 KM i ugovornih obaveza u iznosu od 1.909,00 KM, da društvo ima iskazane obaveze prema dobavljačima u iznosu od 13.653,00 KM, da društvo nema iskazanih dugoročnih finansijskih obaveza. Privremeni stečajni upravitelj je izjavio da je stečajni dužnik platežno nesposoban jer duže od 60 dana neprekidno ne izmiruje svoje dospjele novčane obaveze, nije u stanju da izvršava svoje dospjele i potraživane obaveze plaćanja, a račun stečajnog dužnika je blokiran duže od 60 dana neprekidno, zbog čega su u smislu člana 6. Zakona o stečaju nastupili razlozi za otvaranje stečajnog postupka nad stečajnim dužnikom.

Imajući u vidu da društvo odnosno stečajni dužnik od 2009. godine ne obavlja nikakvu poslovnu djelatnost, da nema poslovnih prostorija, da nema nikakve imovine, da ne posjeduje vozila, opremu i alat za obavljanje poslovnih aktivnosti, da istovremeno postoje dospjele obaveze prema javnim prihodima i prema dobavljačima, da je stečajni dužnik platežno nesposoban jer duže od 60 dana neprekidno ne izmiruje svoje dospjele novčane obaveze, nije u stanju da izvršava svoje dospjele i potraživane obaveze plaćanja, da je račun stečajnog dužnika blokiran duže od 60 dana neprekidno, izjavio je da postoje razlozi za otvaranje stečajnog postupka te da ne postoje nikakvi izgledi da se poslovanje stečajnog dužnika u cjelini ili djelimično nastavi, da stečajni dužnik nema imovine, pokretne ili nepokretne čijom bi se prodajom formirala stečajna masa pa ni za podmirenje troškova stečajnog postupka, te da imajući u vidu obim iskazanih obaveza i nepostojanje imovine stečajnog dužnika, predlaže da sud u skladu sa članom 102. st. 7. Zakona o stečaju javnim pozivom pozove povjerioci i zainteresovana lica da u roku od 30 dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, te da ukoliko u ostavljenom roku povjerioci i zainteresovana lica ne predlože otvaranje stečajnog postupka i ne uplate predujam, sud na osnovu člana 102. st. 8. donese rješenje kojim će otvoriti i odmah zaključiti stečajni postupak nad privrednim društvom „ELVITEX“ d.o.o. Zenica, te odrediti brisanje društva iz sudskog registra po pravosnažnosti istog.

Kako stečajni dužnik ima obveze, a nema imovine, pa ni za troškove stečajnog postupka, to je sud primjenom odredbe čl. 102. stav 7.8. i 9. Zakona o stečaju („Sl. Novine F BiH“ broj: 53/2021), pozvao povjeritelje da predujme dovoljan novčani iznos za pokrivanje troškova stečajnog postupka (otvaranje i provođenje stečajnog postupka), ako su zainteresirani za vođenje stečajnog postupka, kod situacije kada nema imovine stečajnog dužnika iz koje bi se mogle namiriti obveze, pa ni sami troškovi otvaranja i vođenja stečajnog postupka. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupka.

S obzirom na izloženo odlučeno je kao u izreci ovog rješenja primjenom odredbe čl. 102. stav 7.8. i 9. Zakona o stečaju. Ovim rješenjem povjeritelji i zainteresirane osobe su upozoreni na posljedice propuštanja postupanja po pozivu ovog suda.

PRAVNA POUKA:
Protiv ovog rješenja nije
dozvoljena žalba.

Stečajna sutkinja
Sanja Pavlić